



«28» ապրիլի 2023թ.

Ք. Երևան

Որոշում N 0724

ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ

ՀՀ առողջապահական և աշխատանքի տեսչական մարմնի (այսուհետ՝ Տեսչական մարմին) ղեկավարի տեղակալ Սլավիկ Սարգսյանս ուսումնասիրելով.

1. 2023 թվականի մարտի 14-ի թիվ Ն/3320-2023, 2023 թվականի մարտի 15-ի թիվ Ն/3379-2023 և Ն/3383-2023 զեկուցագրերով ներկայացված փաստաթղթերը,

2. ՀՀ առողջապահության նախարարության կողմից 2023 թվականի մարտի 01-ին ստացված թիվ ԱԱ/22.1/4681-2023 և թիվ ԱԱ/22.1/4670-2023 գրությունները, 2023 թվականի մարտի 03-ին ստացված թիվ ԱԱ/22.1/4854-2023 գրությունը՝ կից տեղեկատվությամբ,

3. 2023 թվականի մարտի 15-ի թիվ 06/5047-2023 «Վարչական իրավախախտումների վերաբերյալ արձանագրության կազմանը հրավիրելու մասին» ծանուցագիրը (փոստային առաքանիներ՝ LO108550612AM, LO108550348AM, հրապարակային ծանուցման նույնականացման համար՝ 1267708, հրապարակման ամսաթիվը՝ 29.03.2023թ.),

4. 2023 թվականի ապրիլի 05-ի թիվ 0605 «Վարչական իրավախախտման վերաբերյալ» արձանագրությունը և 2023 թվականի ապրիլի 28-ին կայացած գործի քննությանը հրավիրելու մասին թիվ 06/6934-2023 ծանուցագիրը (փոստային առաքանիներ՝ LO108884114AM, LO108884534AM, հրապարակային ծանուցման նույնականացման համար՝ 1282633, հրապարակման օրը՝ 20.04.2023թ.).

Պարզեցի

Նկարագրական մաս

Ռիսկումնասիրելով 2023 թվականի մարտի 14-ի թիվ Ն/3320-2023, 2023 թվականի մարտի 15-ի թիվ Ն/3379-2023 և Ն/3383-2023 զեկուցագրերով ներկայացված փաստաթղթերը, ՀՀ առողջապահության նախարարության կողմից 2023 թվականի մարտի 01-ին ստացված թիվ ԱԱ/22.1/4681-2023, 2023 թվականի մարտի 03-ին ստացված թիվ ԱԱ/22.1/4854-2023 և 2023 թվականի մարտի 01-ին ստացված թիվ ԱԱ/22.1/4670-2023 գրությունները՝ կից տրամադրված տեղեկատվությամբ, 2023 թվականի հունվարի 30-ի թիվ ՎՎ-0194-Ա հրամանով հարուցված վարչական վարույթի շրջանակներում իրականացված զննման ընթացքում ք. Երևան, Տիգրան Մեծի 16 հասցեում գործող «Մագդա Դավթյան» անհատ ձեռնարկատիրոջը (ՀՎՀՀ՝ 23236631) պատկանող դեղատան վաճառատնային դարակաշարերի վրայից վերցված և արձանագրված «Բակլոսան 25 մգ» և «Նիֆեդիպին 10 մգ» դեղերի դրոշմապիտակները, ք. Երևան, Բաշինջաղյան 7 հասցեում գործող «Սարպի» ՍՊ ընկերությանը (ՀՎՀՀ՝ 01263089) պատկանող դեղատնից իրացված «Ռոակլուտան 10մգ» դեղի դրոշմապիտակը, ինչպես նաև «Նարեկ Կիրակոսյան» անհատ ձեռնարկատիրոջը (ՀՎՀՀ՝ 54700581) պատկանող դեղատանը իրականացված զննման արդյունքում արձանագրված «Բիսակոդիլ 5 մգ» և «Մովիպրեպ դեղափոշի» դեղերի դրոշմապիտակները, պարզ է դառնում, որ ներքոնշյալ դեղերը Հայաստանի Հանրապետություն են ներմուծվել, ապա իրացվել «ԴԱՆԻ ՖԱՐՄ» ՍՊ ընկերության կողմից.

1. Բակլոսան 25 մգ դեղահատեր N 50, սերիա՝ 10722, պիտանիության ժամկետ՝ 07.2025 թ., դրոշմապիտակի սերիա՝ ՋԲ 0249604325 – 49 դեղահատ,
2. Նիֆեդիպին 10 մգ դեղահատեր N 50, սերիա՝ 170622, պիտանիության ժամկետ՝ 05.2025 թ., դրոշմապիտակի սերիա՝ ՋԲ 0278441025 –1 փաթեթ,
3. Ռոակլուտան 10մգ, սերիա՝ B9238B03, պիտանիության ժամկետ՝ 06.2025, դրոշմապիտակի սերիա՝ ՋԲ0278433068 - 1փաթեթ,
4. Բիսակոդիլ 5 մգ դեղահատեր N 30, սերիա՝ 131X3A, պիտանիության ժամկետ՝ 05.2025 թ., դրոշմապիտակի սերիա՝ ՋԲ 02496009419 –1 փաթեթ,
5. Մովիպրեպ դեղափոշի, սերիա՝ 392162-391702, պիտանիության ժամկետ՝ 06.2025 թ., դրոշմապիտակի սերիա՝ ՋԲ 0249705694 –1 փաթեթ:

ՀՀ առողջապահության նախարարության կողմից 2023 թվականի մարտի 01-ի թիվ ԱԱ/22.1/4681-2023 գրությամբ ստացված տեղեկատվության համաձայն.

1. Բակլոսան (բակլոֆեն) դեղահատեր 25մգ; (50) պլաստիկ տարայում Լեհաստան Պոլֆարմա դեղագործական գործարան Ս.Ա., սերիա՝ 10722, պիտանիության ժամկետ՝ 07.2025, սերիան բացակայում է Կենտոնի ներմուծման փորձաքննության տվյալների բազայից, դեղը գրանցված չէ ՀՀ-ում,
2. Նիֆեդիպին դեղահատեր թաղանթապատ 10մգ; (50/1x50/) բլիստերում Ռուսաստան Օզոն ՍՊԸ, սերիա՝ 170622, պիտանիության ժամկետ՝ 2025-05-31, դեղերի և դեղանյութերի ներմուծման թիվ 29584-2022 առ 03.02.2023 հավաստագրի համաձայն դեղը գրանցված չէ ՀՀ-ում:

Համաձայն ՀՀ առողջապահության նախարարության կողմից 2023 թվականի մարտի 03-ի թիվ ԱԱ/22.1/4854-2023 գրությամբ ստացված տեղեկատվության՝ «Ռոսկուտան 10մգ, սերիա՝ B9238B03, պիտանիության ժամկետ՝ 06.2025, դրոշմապիտակի սերիա՝ 2F0278433068» դեղը գրանցված չէ Հայաստանի Հանրապետությունում:

Համաձայն 2023 թվականի մարտի 01-ին թիվ ԱԱ/22.1/4670-2023 գրությամբ ստացված տեղեկատվության՝

1. Բիսակոդիլ Հեմոֆարմ 5 մգ դեղահատեր աղելույծ N 30, սերիա՝ 131X3A, պիտանիության ժամկետ՝ 05.2025 թ., սերիան բացակայում է ներմուծման տվյալների բազայից,
2. Մովիպրեպ փաթեթիկ Ա- մակրոգոլ, նատրիումի սուլֆատ, նատրիումի քլորիդ, ալիումինումի քլորիդ, փաթեթիկ Բ- ասկորբինաթթու, նատրիումի ասկորբատ, դեղափոշի ներքին ընդունման լուծույթի սերիա՝ 392162-391702, պիտանիության ժամկետ՝ 06.2025 թ., սերիան բացակայում է ներմուծման տվյալների բազայից:

Վերոգրյալից պարզ է դառնում, որ «Բակլոսան (բակլոֆեն) դեղահատեր 25մգ; (50)», «Բիսակոդիլ Հեմոֆարմ 5 մգ դեղահատեր աղելույծ N 30» և «Մովիպրեպ փաթեթիկ Ա- մակրոգոլ» դեղերը «ԴԱՆԻ ՖԱՐՄ» ՍՊ ընկերության կողմից ներմուծվել են առանց դեղերի և դեղանյութերի ներմուծման հավաստագրի ստացման:

Միաժամանակ 2023 թվականի մարտի 09-ին ՀՀ առողջապահության նախարարության կողմից ստացված թիվ ԱԱ/22.2/5343-2023 գրության համաձայն՝

«Բիսակոդիլ, սերիա՝ 131X3A» և «Մովիպրեպ, սերիա՝ 392162-391702» դեղերը «ԴԱՆԻ ՖԱՐՄ» ՍՊ ընկերության կողմից ներմուծված լինելու վերաբերյալ տվյալներ չկան:

2023 թվականի ապրիլի 21-ի վարչական տույժ նշանակելու մասին թիվ 0673 որոշմամբ «ԴԱՆԻ ՖԱՐՄ» ՍՊ ընկերության տնօրենը Հայաստանի Հանրապետությունում չգրանցված «Նիֆեդիպին դեղահատեր թաղանթապատ 10մգ; (50/1x50/))» դեղի իրացման համար ենթարկվել է վարչական տույժի, ուստի հաշվի առնելով նշված հանգամանքը, նշված դեղի իրացման համար վարչական տույժ չի նշանակվում:

Փաստական տվյալների վերլուծության և համադրման արդյունքում պարզվել է, որ խախտվել են «Դեղերի մասին» ՀՀ օրենքի 21-րդ հոդվածի 4-րդ և 23-րդ հոդվածի 2-րդ մասերով սահմանված պահանջների պահպանումը:

Հիմք ընդունելով «Վարչական իրավախախտումների վերաբերյալ» ՀՀ օրենսգրքի 255-րդ հոդվածը, 2023 թվականի ապրիլի 05-ին կազմվել է թիվ 0605 վարչական իրավախախտումների վերաբերյալ արձանագրությունը, որը վարչական իրավախախտումների վերաբերյալ գործի քննության թիվ 06/6934-2023 ծանուցագրի հետ միասին ուղարկվել է փոստային առաքմամբ (LO108884114AM, LO108884534AM առ 06.04.2023թ.), տեղադրվել է նաև հրապարակային ծանուցումների պաշտոնական ինտերնետային կայքում (հրապարակային ծանուցման նույնականացման համար՝ 1282633, հրապարակման ամսաթիվ՝ 20.04.2023թ.):

Տեսչական մարմնում (ք. Երևան, Արմենակյան 129) 2023 թվականի ապրիլի 28-ին ժամը 10:00-ին տեղի է ունեցել վարչական իրավախախտման վերաբերյալ գործի քննություն, որին պատշաճ կարգով ծանուցված Հովիկ Մեսրոպյանը կամ իր կողմից լիազորված անձը չի ներկայացել: Վերջինս չի ներկայացրել միջնորդություն գործի քննությունը հետաձգելու մասին:

Պատճառաբանական մաս

«Դեղերի մասին» ՀՀ օրենքի 21-րդ հոդվածի 4-րդ մասի համաձայն՝ «Դեղեր, դեղանյութեր, դեղաբուսական հումք, հետազոտվող դեղագործական արտադրանք ներմուծել թույլատրվում է ներմուծման հավաստագրի հիման վրա, բացառությամբ սույն հոդվածով նախատեսված դեպքերի: Արտահանման դեպքում հավաստագիր

տրամադրվում է արտահանողի ցանկությամբ: Ներմուծման կամ արտահանման հավաստագրերը տրվում են համապատասխան փորձագիտական եզրակացության հիման վրա՝ Հայաստանի Հանրապետության կառավարության սահմանած կարգով: Հայաստանի Հանրապետության կառավարությունը սահմանում է դեղերի, դեղանյութերի, դեղաբուսական հումքի, հետազոտվող դեղագործական արտադրանքի ներմուծման կամ արտահանման համար իրականացվող փորձաքննության կարգը և անհրաժեշտ փաստաթղթերի ցանկը»:

«Դեղերի մասին» ՀՀ օրենքի 23-րդ հոդվածի 2-րդ մասի համաձայն՝ «Արգելվում է իրացնել Հայաստանի Հանրապետությունում չգրանցված կամ որակի պահանջներին չհամապատասխանող կամ պիտանիության ժամկետն անցած կամ գրանցումն ուժը կորցրած ճանաչված կամ գրանցումը կասեցված կամ շրջանառությունը դադարեցված (հետ կանչված), Հայաստանի Հանրապետության օրենսդրության խախտմամբ ներմուծված դեղերը, կեղծ դեղերը, դեղանյութերը, դեղաբուսական հումքը, հետազոտվող դեղագործական արտադրանքը»:

«Դեղերի մասին» ՀՀ օրենքի 21-րդ հոդվածի 1-ին մասի համաձայն՝ «Հայաստանի Հանրապետության տարածք դեղերը, դեղանյութերը, դեղաբուսական հումքը և հետազոտվող դեղագործական արտադրանքը ներմուծվում (Հայաստանի Հանրապետության պետական սահմանը հատելու միջոցով դեղերի, դեղանյութերի, դեղաբուսական հումքի և հետազոտվող դեղագործական արտադրանքի ներս բերում (այսուհետ՝ ներմուծում)) և Հայաստանի Հանրապետության տարածքից արտահանվում են (Հայաստանի Հանրապետության պետական սահմանը հատելու միջոցով դեղեր, դեղանյութեր, դեղաբուսական հումքի և հետազոտվող դեղագործական արտադրանքի դուրս բերում) Հայաստանի Հանրապետության կառավարության սահմանած կարգի համաձայն»: Հավաստագիր ստանալու նպատակով ներմուծողի կողմից ներկայացվում է հայտ, որի հիման վրա՝ ներմուծվող դեղագործական արտադրանքի բոլոր անվանումների բոլոր սերիաներից ընտրվում է մեկական նմուշ՝ համապատասխան դեղերի գրանցանմուշների նույնականությունը հավաստելու համար, նշվածից պարզ է դառնում, որ ՀՀ առողջապահության նախարարությունում առկա է լինում Հայաստանի Հանրապետություն օրինական ճանապարհով ներմուծված բոլոր դեղերի սերիաների վերաբերյալ

տեղեկատվությունը: Վերոգրյալի վերլուծությունից պարզ է դառնում, որ այն դեպքերում, երբ ներմուծման տվյալների բազայում դեղերի ներմուծման վերաբերյալ տեղեկությունները բացակայում են, ապա տվյալ դեղերը Հայաստանի Հանրապետություն ներմուծված են օրենքի խախտմամբ:

Վերլուծելով վերոգրյալ նորմերը և ուսումնասիրելով գործում առկա նյութերը, վարչական մարմինը հաստատված է համարում, որ Հովիկ Մեսրոպյանի կողմից խախտվել են «Դեղերի մասին» ՀՀ օրենքի 21-րդ հոդվածի 4-րդ, 23-րդ հոդվածի 2-րդ մասերով սահմանված պահանջների պահպանումը (հիմք՝ 2023 թվականի ապրիլի 05-ի «Վարչական իրավախախտումների վերաբերյալ» թիվ 0605 արձանագրություն):

«Վարչական իրավախախտումների վերաբերյալ» ՀՀ օրենսգրքի 267-րդ հոդվածի համաձայն՝ վարչական իրավախախտման վերաբերյալ գործը քննվում է վարչական պատասխանատվության ենթարկվող անձի ներկայությամբ: Գործը կարող է այդ անձի բացակայությամբ քննվել միայն այն դեպքերում, երբ տվյալներ կան գործի քննության տեղի և ժամանակի մասին նրան ժամանակին ծանուցելու վերաբերյալ և եթե նրանից միջնորդություն չի ստացվել գործի քննությունը հետաձգելու մասին: Վարչական իրավախախտման վերաբերյալ 2023 թվականի ապրիլի 28-ին կայացած գործի քննությանը պատշաճ կարգով ծանուցված Հովիկ Մեսրոպյանը կամ իր կողմից լիազորված անձը չի ներկայացել և չի ներկայացրել միջնորդություն գործի քննությունը հետաձգելու մասին:

Վարչական իրավախախտումների վերաբերյալ գործի քննության արդյունքում վարչական մարմինը, քննելով գործում առկա բոլոր փաստական հանգամանքները, հաստատված է համարում, որ կատարվել է վարչական իրավախախտում, որի համար պատասխանատու է Հովիկ Գևորգի Մեսրոպյանը (հասցե՝ ք. Երևան, Աջափնյակ, Նորաշեն թղմ. /Շ/37/67 անձնագրային տվյալներ՝ AS0395631, տրված՝ 15.10.2018 թվականին, 012-ի կողմից):

Վերջինիս կողմից վարչական իրավախախտում կատարելու մեջ առկա չեն «Վարչական իրավախախտումների վերաբերյալ» ՀՀ օրենսգրքի 33-րդ և 34-րդ հոդվածներով սահմանված վարչական պատասխանատվությունը մեղմացնող և ծանրացնող հանգամանքներ:

«Վարչական իրավախախտումների վերաբերյալ» ՀՀ օրենսգրքի 9-րդ հոդվածի համաձայն՝ վարչական իրավախախտում (զանցանք) է համարվում պետական կամ հասարակական կարգի, սոցիալիստական սեփականության, քաղաքացիների իրավունքների և ազատությունների, կառավարման սահմանված կարգի դեմ ոտնձգվող հակաիրավական, մեղավոր (դիտավորյալ կամ անզգույշ) այնպիսի գործողությունը կամ անգործությունը, որի համար օրենսդրությամբ նախատեսված է վարչական պատասխանատվություն: Նշված իրավանորմից հետևում է, որ օրենսդիրը վարչական իրավախախտման առկայության հիմքում դրել է մեղքի առկայությունը, որը կարող է դրսևորվել դիտավորությամբ կամ անզգուշությամբ:

Վարչական մարմինը գտնում է, որ Հովիկ Գևորգի Մեսրոպյանը կողմից իրավախախտումը կատարվել է անզգուշությամբ:

«Վարչական իրավախախտումների վերաբերյալ» ՀՀ օրենսգրքի 11-րդ հոդվածի համաձայն՝ վարչական իրավախախտումը համարվում է անզգուշությամբ կատարված, եթե այն կատարած անձը կանխատեսել է իր գործողության կամ անգործության վնասակար հետևանքների առաջացման հնարավորությունը, բայց թեթևամտորեն հույս է ունեցել կանխելու դրանք կամ չի կանխատեսել այդպիսի հետևանքներ առաջանալու հնարավորությունները, թեև պարտավոր էր և կարող էր կանխատեսել դրանք:

«Վարչական իրավախախտումների վերաբերյալ» ՀՀ օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են կառավարման կարգի, պետական ու հասարակական կարգի, բնութային, բնակչության առողջության պահպանության ոլորտում սահմանված կանոնները և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնական պարտականությունների մեջ: Նշված հոդվածից հետևում է, որ Հովիկ Գևորգի Մեսրոպյանը ՀՀ օրենսդրությամբ սահմանված կարգով քաղաքացիաիրավական և վարչաիրավական հարաբերություններում հանդես է գալիս որպես ընկերության տնօրեն՝ պաշտոնատար անձ:

Հայաստանի Հանրապետության Սահմանադրության 73-րդ հոդվածի 1-ին մասի համաձայն «Անձի իրավական վիճակը վատթարացնող օրենքները և այլ իրավական ակտերը հետադարձ ուժ չունեն»:

«Վարչական իրավախախտումների վերաբերյալ» ՀՀ օրենսգրքի 8-րդ հոդվածի համաձայն՝ «Վարչական իրավախախտում կատարած անձը ենթակա է պատասխանատվության իրավախախտումը կատարելու ժամանակ և վայրում գործող օրենսդրության հիման վրա:

Վարչական իրավախախտումների համար պատասխանատվությունը մեղմացնող կամ վերացնող ակտերը հետադարձ ուժ ունեն, այսինքն՝ տարածվում են նաև այդ ակտերի հրատարակումից առաջ կատարված իրավախախտումների վրա: Վարչական իրավախախտումների համար պատասխանատվություն սահմանող կամ այն ուժեղացնող ակտերը հետադարձ ուժ չունեն:

Վարչական իրավախախտումների գործերի վարույթը իրականացվում է իրավախախտման վերաբերյալ գործի քննության ժամանակ և վայրում գործող օրենսդրության հիման վրա»:

Իրավական ակտը համարվում է պատասխանատվությունը խստացնող, եթե սանկցիայում նախատեսված պատասխանատվության տեսակը փոխարինվում է ավելի խիստ պատասխանատվության տեսակով: Ընդ որում, տուգանքների դեպքում պատասխանատվությունը խստացնող է դիտվում այն դրույթը, որով նախկինում գործող տուգանքը փոխարինվել է ավելի բարձր չափի տուգանքով:

«Վարչական իրավախախտումների վերաբերյալ Հայաստանի Հանրապետության օրենսգրքում փոփոխություններ և լրացում կատարելու մասին» ՀՕ-35-Ն ՀՀ օրենքով (այսուհետ՝ ՀՕ-35-Ն օրենք) Վարչական իրավախախտումների վերաբերյալ ՀՀ օրենսգրքի 47.3-րդ հոդվածի 1-ին մասով սահմանված սանկցիաները խստացվել են (ուժի մեջ է մտել 06.03.2023 թվականին), համաձայն որի՝

«Հայաստանի Հանրապետությունում չգրանցված (բացառությամբ Հայաստանի Հանրապետության օրենսդրությամբ սահմանված դեպքերի) կամ գրանցումն օրենքով սահմանված կարգով կասեցված կամ օրենքի խախտմամբ դեղեր ներմուծելը կամ արտադրելը կամ պահպանելը կամ բաշխելը կամ իրացնելը՝

առաջացնում է տուգանքի նշանակում՝ յուրաքանչյուր անվանմամբ դեղի՝

1) մինչև 5 դեղի փաթեթի դեպքում՝ սահմանված նվազագույն աշխատավարձի հազարապատիկի չափով.

2) 5-ից ավելի դեղի փաթեթի դեպքում՝ սահմանված նվազագույն աշխատավարձի երկուհազարապատիկի չափով»:

Հաշվի առնելով, որ Հովհի Գևորգի Մեսրոպյանի կողմից օրենքի խախտմամբ Հայաստանի Հանրապետություն դեղերը ներմուծվել են մինչև ՀՕ-35-Ն օրենքով նախատեսված խստացվող նորմի ուժի մեջ մտնելը, ապա պետք է կիրառել մինչև ՀՕ-35-Ն օրենքի ուժի մեջ մտնելը գործող խմբագրությամբ «Վարչական իրավախախտումների վերաբերյալ» ՀՀ օրենսգրքի 47.3-րդ հոդվածի 1-ին մասի 1-ին կետը, որի համաձայն՝

«Հայաստանի Հանրապետությունում չգրանցված (բացառությամբ Հայաստանի Հանրապետության օրենսդրությամբ սահմանված դեպքերի) կամ գրանցումն օրենքով սահմանված կարգով կասեցված կամ օրենքի խախտմամբ դեղեր ներմուծելը կամ արտադրելը կամ պահպանելը կամ բաշխելը կամ իրացնելը կամ կիրառելը՝

առաջացնում է տուգանքի նշանակում՝ յուրաքանչյուր անվանմամբ դեղի՝

1) մինչև 10 փաթեթի դեպքում՝ սահմանված նվազագույն աշխատավարձի հարյուրապատիկից մինչև հարյուրհիսնապատիկի չափով.

Եզրափակիչ մաս

Ղեկավարվելով «Վարչական իրավախախտումների վերաբերյալ» ՀՀ օրենսգրքի 230, 279, 281, 283-րդ հոդվածներով, և 282-րդ հոդվածի 1-ին մասով՝

Որոշեցի

1. Հովհի Գևորգի Մեսրոպյանին (անձնագրային տվյալներ՝ AS0395631, տրված՝ 15.10.2018 թվականին, 012-ի կողմից)՝ որպես խախտում թույլ տված անձի.

1) «Դեղերի մասին» ՀՀ օրենքի 21-րդ հոդվածի 4-րդ մասերով սահմանված պահանջները խախտելու համար.

«Վարչական իրավախախտումների վերաբերյալ» ՀՀ օրենսգրքի 47.3 հոդվածի 1-ին մասի 1-ին կետի պահանջով (մինչև ՀՕ-35-Ն օրենքի ուժի մեջ մտնելը գործող խմբագրությամբ), Հայաստանի Հանրապետություն ներքոնշյալ դեղերի օրենքի խախտմամբ

1. Բակլոսան 25 մգ դեղահատեր N 50, սերիա՝ 10722, պիտանիության ժամկետ՝ 07.2025 թ., դրոշմապիտակի սերիա՝ ԶԲ 0249604325 – 49 դեղահատ,
2. Բիսակոդիլ 5 մգ դեղահատեր N 30, սերիա՝ 131X3A, պիտանիության ժամկետ՝ 05.2025 թ., դրոշմապիտակի սերիա՝ ԶԲ 02496009419 –1 փաթեթ,
3. Մովիպրեպ դեղափոշի, սերիա՝ 392162-391702, պիտանիության ժամկետ՝ 06.2025 թ., դրոշմապիտակի սերիա՝ ԶԲ 0249705694 –1 փաթեթ,

ներմուծման համար, ենթարկել վարչական տույժի՝ յուրաքանչյուր անվանմամբ դեղի համար սահմանված նվազագույն աշխատավարձի հարյուրապատիկի չափով՝ 3 (երեք) անվանում դեղի համար՝ **300.000 (երեք հարյուր հազար) ՀՀ դրամ վարչական տուգանքի,**

2) «Դեղերի մասին» ՀՀ օրենքի 23-րդ հոդվածի 2-րդ մասերով սահմանված պահանջները խախտելու համար.

«Վարչական իրավախախտումների վերաբերյալ» ՀՀ օրենսգրքի 47.3 հոդվածի 1-ին մասի 1-ի կետի պահանջով (մինչև ՀՕ-35-Ն օրենքի ուժի մեջ մտնելը գործող խմբագրությամբ), Հայաստանի Հանրապետությունում չգրանցված ներքոնշյալ դեղերի.

- 1.Բակլոսան 25 մգ դեղահատեր N 50, սերիա՝ 10722, պիտանիության ժամկետ՝ 07.2025 թ., դրոշմապիտակի սերիա՝ ԶԲ 0249604325 – 49 դեղահատ,
2. Ռոակուտան 10մգ, սերիա՝ B9238B03, պիտանիության ժամկետ՝ 06.2025, դրոշմապիտակի սերիա՝ ԶԲ0278433068 - 1փաթեթ,

իրացման համար, ենթարկել վարչական տույժի՝ յուրաքանչյուր անվանմամբ դեղի համար սահմանված նվազագույն աշխատավարձի հարյուրապատիկի չափով՝ 2 (երկու) անվանում դեղի համար՝ **200.000 (երկու հարյուր հազար) ՀՀ դրամ վարչական տուգանքի,**

3) «Դեղերի մասին» ՀՀ օրենքի 23-րդ հոդվածի 2-րդ մասերով սահմանված պահանջները խախտելու համար.

«Վարչական իրավախախտումների վերաբերյալ» ՀՀ օրենսգրքի 47.3 հոդվածի 1-ին մասի 1-ին կետի պահանջով (մինչև ՀՕ-35-Ն օրենքի ուժի մեջ մտնելը գործող խմբագրությամբ), օրենքի խախտմամբ Հայաստանի Հանրապետություն ներմուծված ներքոնշյալ դեղերի.

1. Բիսակոդիլ 5 մգ դեղահատեր N 30, սերիա՝ 131X3A, պիտանիության ժամկետ՝ 05.2025 թ., դրոշմապիտակի սերիա՝ ՋԲ 02496009419 –1 փաթեթ,

2. Մովիպրետա դեղափոշի, սերիա՝ 392162-391702, պիտանիության ժամկետ՝ 06.2025 թ., դրոշմապիտակի սերիա՝ ՋԲ 0249705694 –1 փաթեթ,

իրացման համար, ենթարկել վարչական տույժի՝ յուրաքանչյուր անվանմամբ դեղի համար սահմանված նվազագույն աշխատավարձի հարյուրապատիկի չափով՝ 5 (հինգ) անվանում դեղի համար՝ **200.000 (երկու հարյուր հազար) ՀՀ դրամ վարչական տուգանքի,**

4) Տուգանքի ընդհանուր գումարը կազմում է 700.000 (յոթ հարյուր հազար) ՀՀ դրամ:

2. Սույն որոշումը ծանուցել Հովիկ Գևորգի Մեսրոպյանին (հասցե՝ ք. Երևան, Աջափնյակ, Նորաշեն թղմ. /Շ/37/67 անձնագրային տվյալներ՝ AS0395631, տրված՝ 15.10.2018 թվականին, 012-ի կողմից), ինչպես նաև ք. Երևան, Աջափնյակ, Մ. Մազմանյան փողոց 5/28 հասցեներով:

3. Սույն վարչական ակտն ուժի մեջ է մտնում վարչական վարույթի մասնակցին իրազեկելուն հաջորդող օրվանից:

4. Սույն որոշումը ստանալու օրվանից 30 օրվա ընթացքում կարող է բողոքարկվել ակտն ընդունած Տեսչական մարմին կամ ՀՀ վարչական դատավարության օրենսգրքի 72-րդ հոդվածով սահմանված ժամկետում՝ ՀՀ վարչական դատարան:

5. Իրերի և փաստաթղթերի հարցը լուծվել է:



Recoverable Signature

X

ՍԼԱՎԻԿ ՍԱՐԳՍՅԱՆ

Signed by: SARGSYAN SLAVIK 3807890467

ՍԼԱՎԻԿ ՍԱՐԳՍՅԱՆ

Ինձ բացատրվել է, որ համաձայն «Վարչական իրավախախտումների վերաբերյալ» ՀՀ օրենսգրքի 305-րդ հոդվածի 1-ին մասի, տուգանքը պետք է վճարվի տուգանք նշանակելու մասին որոշումը հանձնելու օրվանից ոչ ուշ, քան տասնհինգ օրվա ընթացքում, իսկ այդ որոշումը գանգատարկելու կամ բողոքարկելու դեպքում՝ գանգատը կամ բողոքը առանց բավարարման թողնելու մասին ծանուցման օրվանից ոչ ուշ, քան տասնհինգ օրվա ընթացքում:

Ծանոթություն՝

Իրավախախտման համար կիրառվող տուգանքի վճարման պետքայուքի հաշվի համարը՝ ՀՀ առողջապահական և աշխատանքի տեսչական մարմնի կողմից իրավախախտումների համար կիրառվող տուգանքների և պատժամիջոցների մուտքեր N900005024097:

Որոշումը ստացա _____

(անունը, հայրանունը, ազգանունը, պաշտոնը, ամսաթիվը)

Որոշումը ստանալուց և ստորագրելուց հրաժարվելու մասին նշում _____

Նշում որոշումը պատվիրված փոստով ուղարկելու և ստանալու ծանուցման մասին

(ուղարկելու ամսաթիվը, փոստային առաքանու համարը, փոստային առաքանին հասցեատիրոջը հանձնելու վերաբերյալ ծանուցագրի համարը)